

بلا ن علمه کرکله عمل

سر
ینه
له



قطب معظم وغوث اعظم ابو العلمین السید احمد الرفاعی
الحسینی الکبیر حضر تکرینک تهذیب اخلاقه
دائر بعض حکمیات جلیله لریدر

738

مترجم

طاب ثانی جناب شهرباری مرحوم (قدری) افشار بنگم

ت ابن

معارف نظارت جلیله سنک ۵۹۴ نومرولی و ۱۵ جمادی الاخره سنه ۱۳۱۳
تاریخی رخصت رسمیه سیله طبع و نشر اولمشدر

استانبول

(معلومات) مطبعه سی — باب عالی جاده سنده نومرو ۵۲

۱۳۱۳

Süleymanî Kütüphanesi

Hasan Hüsnü Paşa

V

Esn

798

۷۹۱

بِسْمِ اللَّهِ الرَّحْمَنِ الرَّحِيمِ

حمد بن انتها یارب سنکدرکه مظهر عرفان ایتدیکک برقولنک ات پارچه سندن عبارت اولان یورکنه اولیه برقوه فهم احسان بیوردیغت کوریلورکه ماهیات ذرات اکوانی بیلیور دائم صلوات واکمل تسلیات سنک اول **رسول محترمنه وحبیب اکرمه عرض واهدا قنورکه** نظر اکسیر اثر رسالت پناهیمی پڑمرده دل جهالت و غوایت بر لحظه شامل اولسه کنز الجواهر عرفان اولیور بوصلات و تسلیم **آل فخام واصحاب** کرامنه ده عمیم اولسونکه هربری محراب معرفت جناب رب الاربابده مقتدا اولمشدر **بعددا** بیان مافی الضمیره ابتدار اولنور.

العلماء ورثة الانبیاء حدیث شریفیله قدر و اعتبار عالیسی غایت مراتب ارتقایه ایصال ایدلش اولان مزیت علمییه درجات متفاوته ده اوله رق مرآت ظهور انعکاساتی دخی آثار در آثار صنع جناب کردکار اولان آیات انفس وفاق نصل عظمت و قدرت حضرت بارییه دلالت امارایسه نوع بشر ایچونده **ان آثارنا تدل علینا فانظروا بعدنا الی نار** دینلمشدر او مقوله آثار جلیله نك اك عالیسی مطاوی الفاظ بدیعده شارقه انداز افهام اولان معانی و نکات اولدینی دخی مسلماتدن اوله رق اسالیب تألیف کلماتده و انتخاب معانی خصوصنده تفاوت درجات اول قدرده وارمشدرکه بزم کبی برعاجزدن تاذروءه عالیة اعجازده اولان آیات قرآنییه قدر برعظیم بعد و مسافه استیعاب ایتمشدر **فوق کل ذی علم علیم** اول فیفای بهنای وراثت جلیله ده رهنورد مسافات

کمال اولان علما کرلار **عل باطن وکرك اهل ظاهر** دن اولسون هر حالده مزیت محترمه وراثته مظهر اوله رق بزجه برطرفک دیکرینه ترجیحی خدمن دکلسه ده بوده خفی اوله مزکه هم باطنی همده ظاهری جمع ایتش اولان وراثت انبیا امرنده تکریر و تزییر دفاتر ایله اشتغال اوله رق لوحه سینه یه نقش معلومات ایتک روز و لیل مجاهده ایله اشتغال اوله رق علوم لدنییه و غیبیه یی مرآت قلبه عکس انداز ایتدیرمک کبی دکلدرد.

حدیث جلیل وراثتی بوصورتله **وعلمناه من لدنا علما** آیتی ایله مزج ایدن صنف ثانی عصر کمالا تدر بوزمره مقدسه میاننده سرافراز وسطور آرای مؤلفات عدیده اولدینی اوزره تلثیم دست سعادت پیوست حضرت صاحب رسالت ایله بین الاقطاب ممتاز اولان غوث اعظم و قطب مکرم سید العراقین سلیل الحسین مولانا ابوالعالمین السید احمد الرفاعی حضرت تدرینک اثبات وراثت نبویه ایلیان آثار جلیله ده حقا که ید طولاسی برهان مؤیددر **تنبيه** سید اقطاب جهان السید احمد الرفاعی قدس سره السامی حضرت تدری ابن السید علی الرفاعی دوفین بغداد ابن السید یحیی نقیب البصره ابن السید ثابت ابن السید علی الحازم ابن السید احمد ابن السید علی ابن السید رفاعه الحسن المکی ابن السید مهدی ابن السید محمد ابن السید الحسن القاسم ابن السید عبدالرحمن الحسین ابن السید احمد الصالح الاکبر ابن السید موسی الثانی ابن السید ابراهیم المرتضی ابن الامام موسی الکاظم ابن الامام جعفر الصادق ابن الامام محمد الباقر ابن الامام زین العابدین علی السجاد ابن **الامام**

الحسين شهيد كربلا سبط النبي صلى الله عليه وسلم ابن الامام علي امير المؤمنين كرم الله وجهه ورضي الله عنه وعنهم اجمعين آمين * ائمة عظام آل بيت نبويدنصكره جناب پير مشاراليه رضي الله تعالى عنه حضرت تالرينك كمالاته ايرشمش يوقدر دينلسه جائزدر كه آثار كمالاتك هپسي كرامات باهره دن معدوددر.

طريقت عليه لرينك بعض درویشانده آتشك خاصيت احراقيه سني يعنى ياقيشنى ازاله ايتك حيه وعقرب كبي بالطبع فطرتنده انجتمك اولان حيواناتك مقتضاي طبيعتلرينى تحويل ايلمك آلت جارحه نك كيشي تأثيرسز براقوب كسسه دخى ضرر ويرمامك زهر هلاهل اولسه تأثير ايتامك مثلاو اليوم نصل خارقات مشهود اوليور ايسه علم ومعارفده فائق الاقران اولديغنه دلالت ايليان مؤلفاتى ده كوريليور كه بو آثار جليله وخوارق جليه نظر انصافه النوب تقدير اولنور * وترك عناد ومكابره ايديلور ايسه اعظم علمای تاريخدن وكمين صالحيندن محمد بن ابى بكر بن على بن عبد الملك بن حماد الموصلى تاريخنده بيان ايتديكى اوزره مشاراليه رضوان الله تعالى عليه حضرت تالرينك زمان حياتنده خانقاه شريفى علمای دين ايجون مدرسه اولديغى كبي زمرة سالكين ايجون رياضتخانه اوله رق كنديلرى ده رجال عرفان ايجون برره بر بى مثال اولديغى تسليم اولنور.

مؤرخ مومى اليه رحمة الله تعالى عليه صحائف تاريخنده غوث اعظم مشاراليهك ترجمة شريفه سني ايراد ايلديكى محله شو وجهله يازيور كه:
جناب سيد الاقطاب الغوث الاعظم الامام السيد احمد الرفاعى

رضى الله عنه بشيوز اون ايكي تاريخ هجر يسنده مهد آراى شهود اوله رق صيت جلالت وفضيلتى دكل عراقينى خافقينى لبريز ايتمش ايدى مشاراليه اورته بويلى ايدى اسمرايدى سكوتنده مهابتلى ايدى تكلمده غايت سويل اولور ايدى * روز وشب اشتغالى احيای شريعت ايله ارشاددن عبارت ايدى * باطن وظاهر علومنده يكتاي جهان ودريای بى پايان اولوب فقط اصول تدريسى وعظ ونصيحت يولنده ايدى * كرسى وعظه چيقدينى وقت اطرافنى اكابر علما وفحول فضلا آلور ايدى صنوف ارباب علوم وفهوم استماع مواعظنه هر طرفدن قوشش لر ايدى * كلامه باشلا دينى كبي هر كسه حيرت كلور ايدى * منكر لر مبهوت اولور لر ايدى متكلمين لال وابكم قالور لر ايدى * اصحاب سلوك وجد ورقصه كلور لر ايدى * اهل خشوع آغلر لر ايدى * ارباب تمكين بيله ذهول ايدر لر ايدى * كنديسى ايسه وارث اولديغى جوامع الحكم ايله القاي مواعظ ايدر ك ديكلان جماعته كوره هر فندن بحث ايدر ايدى * بونك ايجون فصاحتندن ادبا مستفيد اولور لر ايدى * معارفندن علما استفاضه ايدر لر ايدى * تحقيقا تندن اهل فلسفه كشف حقايق ايدر لر ايدى * تبيانندن ارباب كلام استفاده ايدر لر ايدى * دقايقندن بلغا حصه دار اولور لر ايدى * حقايقندن اوليا لذتياب اولور لر ايدى * حكمتندن عقلا مواعظندن حكما آدابندن فقرا الحاصل هر صنف كندينه كوره فضائل ومعلوماتندن اقتباس ايدر لر ايدى * هپسيده فتوحات غيبه وفيوضات الهيه يه مظهر تى خصوصنده حيران اوله رق كنديسى شريعت مطهره نك لب اللبابندن دريای پر جوش وخروش كبي موج خيز بيان وعرفان

اولدچه سطوت قاهره ناطقه سی افکار اهل غروری مضمحل و ویران
 واصحاب فهومی موأند فوأند ايله دلیر فیض و عرفان ایدر ایدی *
 علودن غلودن و عظنده سوزنده برشمه بولمز ایدی. دیدیکی کبی
 خارقات محرره و کرامات باهره - نی تعداد نصکره ایمان ایلدم که **مولی**
 بر در شریکی یوقدر **قرآن کریم** اشرف کتب سماویه در * **حضرت محمد**
 صلی الله علیه وسلم افندمز سید المرسلیندر * **السید احمد الرفاعی** سید
 اولیا و سید مشائخدر * دیمشدر که صحیح و حق صریحدر.

مشار الیه رضوان الله تعالی علیه حضرت لری فیوضات لدنیه یه
 بورتبه ده مظهریت ايله متناسب فصاحت و بلاغتی حائر برقرشی
 بولند قلرندن و معلومدر که فصاحت قرشیه اوزره سلاست عربیه بو
 مثلومز یات خارقه علمیه یه انضمام ایدر ایسه تألیف ایدیلان آثار و نطق
 بیوریلان کفتارک احراز ایلدیکی طبقه اعلا رتبه تقدیر و تقریرک
 فوقنده اوله جفندن ترجمه آثار جلیله سی دکل بنم کبی بر عبد عاجزه
 فحول فضالیه کوره دخی مستحیلاتدن دکلسه ده مشکلاتدندر.

مع هذا آثار محترمه سندن اوله رق برقاق مقاله و عظیمه نک لسان
 ترکیه ترجمه سی خصوصی بعض محبان طرفندن بوکم بضاعه یه تکلیف
 اولنسی مرتبه اقتدار ايله متناسب بر تکلیف دکلسه ده طریقت علیه یه
 انتساب عاجزانه امثاله مجبوری ویرمش اولسنه بناء اول علامه علوم
 لدنیه و فهمه معانی غیبیه نک آثار علیه سندن بعض کلمات حکمت آیات
 ايله برابر مقالات مذکوره بوکره سلك ترجمه یه کشیده **و مجالس حضرت**
امام رفاعی تسمیه ایدلمشدر.

فاتحه محرره نک خاتمه متیمنه سی اولمق اوزره وجیهه ذمت اولوب
 دائماً ورد زبان عبودیت اولان دعوات خیریه ملوکانه نک وظیفه
 تلاوتنی ایفا ایدم:

برقاج سنه در سرای هایونلرنده ایکنجی کتابت خدمتیه امرار
 ایام حیات و اکتساب فخر و مباهات ایتکده اولدینم ولی نعمتم مایه
 بخش حیات و رفعت پادشاه دیندار و شهنشاه ممدوح الانار وارث
 خلافت کبری و صاحب سلطنت عظمی امام المسلمین و امیر المؤمنین
السلطان ابن السلطان ولی نعمتم پادشاهن السلطان عبد الحمید خان
 غازی افندمز حضرتلرینک عصر هایون ملوکانه لری بومثلومنتخابات
 آثار محترمه ایچون بر بازار اشتهار و افکار عالیه ملوکانه لری ارباب فضل
 و عرفانه فرصت روزگار اولمشدر.

ربم ما کرت الدهور ومرت الایام والشهور ایام عمر واجلال
 وهنکام شوکت و اقبال جهانبا نیلرینی آنا فنا مز داد و فراوان واریکه
 خلافت و سلطنت عظمالرنده همیشه مسرور و شادان بیورسون. عهد
 هایون ملوکانه لرینک بوشرف و ابتهاج دائم ايله قائم اولمسی فی الحقیقه
 اصدقای بندکان وزیر دستان بلکه عموم جهانیه بر سرمایه سعادت
 اولمغله ظل ظلیل شاهانه لری بلطف المولی مادامت الدنیا مقرر عدل
 و امان و سعادت بخش جهان اولمسی فی الحقیقه امانی عمومیه دندر که
 دعای بالخیر شاهانه لرینه اهل جهان آمین خواندر.

مقالات و عظیمه **حضرت پیر دستگیردن** آیات انفس و آفاق کیفیتنی
 مشتمل برنجی مقاله نک ترجمه سی بودر:

بسم الله الرحمن الرحيم

سندن بشقه سزاوار تحمید واحسان و مرتبتدن ماعدا شایان
استدعای عید اولیان **یا حی یا قیوم** حمد و ثنا سکا مخصوص صدر.
دین حق و هدایت کافه خلق ایچون بعث و ارسال ایتدیکک
عبد خاص و رسول صاحب اختصاصکه عرض صلوات و تسلیات
اونورکه عتبه علیای رسالتا بلرندن دور اولانلر مطرود رحمت و کنندیسنی
پیشوا اتخاذ ایدنلر اهل سعادتدر.

آل و اصحاب و اتباع و احباب کرامنه ده رضوان و تحایا اهدا و نهایت
دورانه قدر تابع غیر مبتدعلرینه شامل اولسی دخی استدعا اولنور.
{برادرلر} عقول بشریه محتاج ریاضتدر برنجی ریاضت عقلیه دخی
تفکر آثار قدرتدر * کور میور میسکز که جل جلاله بوخا کدانی نصل لف
و بسط ایتش ونه کوزل تصویر ایدوب اوستنه فضای آسمانی آچمشدر.
آفتاب ضیادار بوفسحتسرای عالم بالاده یوارلنسان بر کوکب
منوردر * طبقات مختلفه ده نیجه کواکب دخی منتشردر.

کواکب مشهوره نك بعضیسی بودنیادن بیوک اولدینی کبی صورت
متفاوته ده یکدیگرندن دخی جسم عظیم اوله رق ضیا و انوار مقادیر
مختلفه ده اشعه نثار اولوب نار شعاع هر جهتدن امتداد ایله اوله قارشمش که
مصادمه دائمه جاریدر * ابراج معینه ده هپسی دونوب دولاشه رق
سیرنده ثابت و ثباتنده سائردر.

بونلرک هر بری ماوراسنه حجاب اولدینی حالده عالم غیبده قائم
اوتده دهها نه حجابلر واردر که منتهای بصردن دهها اوزاقده بولنه رق

کور یله مدیکندن عقل انکار ایدیور.

حالبوکه بواجرام و اجرامدن بشقه کوزلریزه کوچک کورینان
نیچه اجسام واردر که انلر یله حد ذاتنده دنیادن چوق بیوکدر.
دستکسز اوله رق بونلرک هوای ساکنده و انجذابات طبعیه ایله
مواقع معینه ده اولان ماوالری خطوط مخصوصه ده ادوار فلکیه اجرا
ایدن پارلاق کواکبک اوستنده چادر شکلی المشر * سیاحتلرینه
غایت اولیوب دوشمیه رک یوزوب کیدیورلر و مسافهلرینی قصالدوب
طی ایده میورلر * کوکب تربیه اولان کونش. و کوکب تعدیل اولان شو
یالینلی آی بونلر دندر * کونش مایه منافعه در * اشعه نثار اولدجه شکوفه لر
آچیلور و قوت نباتیه اعتدال بولور.

طوپراقلرده نما استعدادی بولنسی و صولرک فیشقروب اقسی
وهر ماده نك طبیعتیه متناسب بر حالده بولنسی بو کوکب شمسك
انتقالاتی نتایجندنر.

کونش هر ماده نك حکمنی اعطا ایدیور قومه ده فعلده اولان کافه
نباتاته تهیه غذا ایلوب مواد نباتیه نه زیاده نه ده اکسیک طبع و عادتک
ترسیم ایتدیکی اطواره کیرمک ایچون بوندن صکره استقرار احتیاجنده
اوله رق کونشدن انجابه میل و اولوقت اشته لیل اسبال ذیل ایدر *
شمسك ذراتده براقدینی حجاب شب تسویه و بعض اوفق یلدیزلر
دخی بو وظیفه یی مشترکا تأدیه ایدرک ذراتده ایجابنه کوره بو حال
سریان و شب بشب بوتسلسل جریان ایدر.

کوکب قمر دخی هلال ایکن بحکمة الله تعالی جمیع اشیایه متناسب

اطوار ايله ترقی ایده ایدہ بدر کامل اولور.

قوة فعاله شمسیه نك ظهوری ایچون انفلاق فجر نسیم جان فزاسیله تمهیدات اجرا ایدوب کیجه نك اتکلینی یواش یواش چکوب قالدیره یور صباح دخی انفلاقه نشانه ایضاح اولیور.

ایشته بو ترتیب اوزره هم کوندوزلر همدہ کیجه لر یکدیگرینه طوغری حرکت موزونه اجرا سنده دوام وهر برینک یرادلدیغی خاصیت اوزره وظیفه مخصوصه سنی قرین انتظام ایتکده در* اوستنده بولندیغمز کره ارض ايسه بالمقابله دورینی اجرا وهر بر قطره عائد اولان حصه یی بومعامله ومعادله دن اخذ واستیفا ایدوب کیده یور. [۰]

بعضاً بر قطره بو معادله ايله دیگر اقطارک رایحه سی مرور ایدرایسه اختطاف دوره دن عبارت اوله رق بعید الوقوع وعندالتصادف یک قریبدرکه قطرک طبایع معدنیه وایجابات موقعیه سی وزمان ايله متناسب خفت وثقلده اولور.

احوال دوریه یی بو وجهله فوائد ومنافع مخلوقات ایچون ترتیب ايله اظهار آثار بدیعہ قدرت بیورمش اولان ذات اجل واعلاد کزلی دخی مسکنلری اولان معدنلرده بند ایدوب طور دیرمشدر. ودیللری درلو درلو اوزانمش اولدیغی حالده بر حال وهیئته قالب کیتمشدر.

مواد رطبه دن تجمع ایدن صولر حرارت فلکیه دن متأثر اوله رق یالچین قیالرک دلیکلرندن فیشقروب بوعلت ايله جریان ایتکده وماده

[۰] للمترجم بوفرده کره ارضک دوری ایضاح اولمشدر. جناب امام رفاعی بونی مشهور غلیله دن بشیوز سنه اول بیان بیورمش اولیور لکه هر وجهله شایان دقدر. انهی.

مائیه سی آزالنجه کسيلمکده در.

بونلر آثار قدرت صمدانیه در* صنع عجیب وحکمت بالغه خداوند در* انبیای ذیشان حضراتنه برنوع معاونتدرکه انکار وحدانیت ایدنلرک علیهنده حجتدر.

قوة مدرکه ايله امتیاز ایتش اولان انسانلره بونلر مکرمتده اولورکه اشبو آثار باهره واسطه سیله نفوس بشریه نائل نعم نامتناهیہ اولمقده اولدیغندن سلطنت وعظمت الهیه یه سرفرو پرده عبودیت اولمق ایچون کسب انتباه ایده جکاردر.

مفخر عالم صلی الله علیه وسلم افندمن بونلرک هپسینی ودها فوقنده کیلرینی بزله ایضاح و بیان بیورمشلردر* اما عبرت اکتساب ایدنلر وارمیندر* صرف فکرت ایدن بولنورمی* هیئات اکلیان نرده اکلا یوبده آغلیان نرده.

اشبو مکوناتک هپسی وحدانیت جناب حقه دلالت ایده یور* فقط سلوک مستقیم وقلب سلیم بولنیوب **فخر کائنات علیه افضل الصلوات افندمن** دخی باب عزتآب جناب مولایه بالذات رهبردر وحدانیت خدایه برهان عالیدر.

تابکی بو غفلت **پیغمبرمن افندمن** اول نذیر عریاندرکه هپسینی تبلیغ و بیان بیورمش وبرشی کتم ایتما مشدر* فقط یوزی قیزاران وارمیدر. شمشیر قدر هر وقت پارلامقده و اظهار عجائب ايله هر ساعت کوزلری قاشدیر مقده در.

اهل غروری قیون سورر کبی چقورلره نصل کوتوروب آتمقده

اولدینگی کورمیور میسکزی؟

برادرلر! داعیه غرور ایله جربان ایدن هر حرکت تدقیق اولنور ایسه ایچنده داعیه عجز کورینور و تجاوز حدوده مانع اولور. قوت غرور بو داعیه عجزه ممانعت ایده مزکن یاز قدرکه عقل حسب الغرور اکتناه کیفیتدن دور اولمشدر.

هله عقلکده هر بر سکونی تدقیق اولنورسه اسرار ادراک ایله ممتزج جولانده بولندینگی کوریلورکه دریای عبرتده یوزه یوزه اقرار وحدانیت مرکزینه کلوب طور دینی حالده بیچاره عقل بوندن دخی خبرسز قالمشدر.

انفاس معدوده حیات نصورتله چیقوب کیره یور * ایام ولیالی نصل متصل دونوب چکیور * عجبا عقلره نه اولمشدرکه عبرت آلمیه رق فائده سز شیرله هوالنیور * اوهامه نه کلمشدرکه مشهوداتی براقوب بلورسز صوکسز شیرله یوزوب کیده یور * نه چاره که نصیحت کامله قلب سلیمده ایجه تأثیرات کویسترر ایسه ده قلب غیر سلیمده طورمز کچر قلوب سلیمه اصحابی نصایح ایله متأثر اوله رق عبادتله اشتغال ایدرلر قلوب غیر سلیمه یه القا اولنان نصیحت هیچ تأثیر ایتیموب اوزرنده شویله برمرور ایدر بو حالده نصل خیر و منفعت حاصل اولسون **برادرلر!** بوفوائد ذائقه عقل ایچون موانددر * انجق او عقل کامل هانیا که پک آزدره خلقده اصحاب عقول چوق اولسیدی اختلاف تعظماً چوغالسه ده حقایق ینه نمایان اولور ایدی و سر حقیقت خدعه ایله کتم اولنمق ایستلنسه ده کورینور ایدی.

عقلک قوت دهاسی کرسی دماغده بارزددر * ولسان ایله ساحه قلبده حکمی نافذدر.

انسانده هر خاطره اولای طلیعه فکریه دن تولد ایدوب ساحه خواطره کلورکه ضابطه حافظه انی تعقل و تفکره حاجت کورمکسزین اخذ و کرفت ایدوب واسطه فکرت متعقله ایله میزان عقل سلیمه تسلیم ایدر * اوراده تحت تحقیق و تدقیقه آنه رق خاطره خیریه اولدینگی تبیین ایدر ایسه اجراء دکلمه تبعید والقا اولنور * انجق بوموازنه عقل سلیمده جاری اولوب یوقسه عقل سلیم اولمز ایسه ضابطه حافظه خاطره یی تدقیق و تحقیق ایچون حظوظ نفسانییه تسلیم ایدرکه نتیجه تدقیقاتده هواوهوسه کوره برشی ایسه الیقور دکلمه رد ایدر.

هوا وهوس دنییلان شی شهوتدن محبت راحتدن مایه دار اوله رق بونک خوشلانه جنی شیده خیر اوله بیلورمی.

میزان عقلک شرفی ایشته بوراده رونما اولور. عقل فی الحقیقه بصیرتدن اکملدر و عملدن شرفلیدر عقلسز اولانه عمل و بصیرت زیرا هیچدر هر حالده شرف اعمال و محاسن اخلاق و خصال عقلک تماس ایلدیکی مقدار ایله متناسبدر.

باری تعالیٰ **حضر تالینه** قسم ایدرمکه هر بار سنی مشیت الهیه سته طوغری سوق ایدیور. عقل ذخایرک انفسیدر مدخراتده عقله معادل یوقدر. بذل قیمت ایچون الک عالی بضاعه دره قدس حقه تقرب ایچون الک یقین وسیله در پیغمبر ذیشان علیه صلوات الرحمن افندمره وصول ایچون الک اچیق یولدر.

بعضی‌ری عالم انسانه عقل رسول مبعوثدر دیمشدر چونکه جناب مولایه وحیب خدایه عقل برهان دالتدره نفس و افاقك اهل ایتنی ادراك و ابراز ایدن انجق عقلدر.

بو بویله در فقط مخالفت اولندیغی تقدیرده عقوبت کورینه جك مبعوث عقل دکلدر جناب پیغمبر اکرم و مبعوث اعظمدر صلی الله علیه وسلم افندمنز دلالت قاطعه عقلیه ایلله مؤید برهانی عیان بیورمشدر که هب تبلیغات جلیله جناب رسالتپناهی حجت قاطعه عقلیه ایلله قائم اولمشدر.

هله عقل کنوز الهیه دن برکنزدر که جواهر آدابی احاطه ایلمشدر رشته تحکمنی کوکلره اوزاتمشدره عقل بر ماده نوریه در بعض حواسک معطل اولمسیله دوچار ضعف اولمز قیاس ایتک ایچون روحدن بشقه عقلک دائرة مماثلتنه برشی کیره من.

ماده عقلیه الم اعضا ایلله محجوب اوله رق دوچار ذهول اولور حب اشیادن انده اش ایلله انزعاج ایدر و بعضایأس کلی و برلشمش اندیشه لرله مدارندن ایریلور.

بعض انسانده بویله شیلرک عقله تأثیر ایده مامسی ده اوله بیلور او حالده عقلک هیئت نورانیه سی عظیم دیمکدر کندیسيله قائم اولان بر رخته تحکمی جاریدر بویله اولور ایه هر حادثه ده قدر ایلله برابر اوله رق وحدانیت بارییه ایمان و حکمت الهیهیه خشوع حالنده بولنور مقام رضاده حاصل اولان مکاتتی ایلله کندیسینه اثار کورنمز حال حیاتده جانب اجل و اعلادن افتقاده مظهر اولمش اولسندن طولانی

تلذذ ایدر و بعدالموت شرف دیدار ایلله مسرور اوله جفنه سوینور ایشته مقام رجال محمدی بودر معرفت الهیهیه مظهر اوله رق ایمان کتورمشدر و توکل ایتمشدره الان اولیاء الله لا خوف علیهم ولا هم یحزنون آیت کریمه سنده یاد بیوریلان اولیا انلردر.

قورقزلر چونکه کندی اختیارلری قلامش اختیار جناب کردکاره باغلامشدردر * جناب مولا ایه اسقاط اختیار ایدن قوللری ایچون وقایه و امنیتدن بشقه سنی اختیار بیورمنز **وهو یتولی الصالحین** محزون اولملر انقلاباتدن و ترادف حادثاتدن محزون اولملر یوم اللقا حجابک حزنی دخی بونلره کوره دکلدر.

مولانک هدایتیاب ایلدیکی قوللری بونلردر اقتدا ایدیله جك هدایت بونلرک اهتدالریدر ماسوادن بتون بتون ایریلوب حق ایلله قائم اولان بونلردر.

بونلر دنیوی اولان ایشلری حکمتلری تماما بیلورلرده زهادت جهتیه بویله شیلرله اشتغال ایتملر بونلر اخروی اولان درجاتک کافه سنک اسرارینی دخی بیلورلر.

واندن ایرملرلر و هرایکی خصوصده عمل و حرکتلری الله ایچوندر مقصدلری اللهدر بوندن طولانی **رجال الله** دینلمش **اهل الله** تسمیه قلمشدر بونلرک یوانده کیتمه چالشمه کن لازمدره اثار مبارکه لرینه متابعت ایتمه لیسکنز یارد مجیلرندن جمعیلرندن اولمیسکنز حزب الهی بونلردر فلاح و ظفر حزب الهینکدر.

برادرلر فتوحاتمز بو قدرجه در والی الله المصیر.

﴿مقاله ثانیه﴾

بسم الله الرحمن الرحيم

جناب خدایه حمد و ثنا که اسباب عادیه کسسته تار اولدجه قلوب اهل توحیده مرجع و ملتجادر و فستخسرای امیدک قبولی قیاندجه ارباب اماله درگاه عزتی محط رجادر اول فرد و صمد در که عارف و جاهل جمله اهل احتیاجک حوایجی آستان قدرتمده اعتکاف ایتشدر اول پادشاه باقیدر که مهر منیر سرمدیتی اعیان و ذرات عالمده فنای محض اظهار ایلمشدر سلطنت الوهیتک عظمت و جلالی اولیه غالبدر که مدافعه اولنه مزه شان عالی ربوبیتک آیات باهره قدرتی اول قدر عالیدر که منازعه ایدیه مزه حال درمانده کی و عجزده کافرک طبیعتی بیه اکامیل و محبت ایلر هنگام بیچاره کیده منکرلرک روحی اقرار و اعتراف و حدانیتده بولنور قدرت ازلیه سی اولیه بر حاکم مطلقدر که بیوکده کوچکده حقیقت عجزی ایقاع ایده یور عظمت فردانیتی برتفرد ایلمشدر که هر فردی بالطبع دائره انفراددن تبعید و قطع ایلور ابراز ایلدیکی شواشکال و صور صحائف عقول ارباب افکاری لکه دارشبهات ایلمش ایکن وحدانیتی انکار ایده میورلر طراز آرای اکوان ایلدیکی حقایق قلوب زمرة مقربیندن اول درجهده محو شک و اشتباه ایتشدر که تنزلات اوامر ربانیه سنی اکلاویه بیورلر.

حالبوکه بوعجز و اشبو اقتداردن صکره عظمت الوهیتی اصحاب اذعان و ادراکی اولیه پردهلر ارقه سنده بر اقصا در که لسان دهشتلری المعجز عن الادراک ايله رفع صدا ایده یور و یوفیفای پهنای معرفتک

اشهبسوار یکانه سی اولان اکمل واعظم مخلوقات بیه سبحانک ما عرفناک **حق معرفتک** دیور ای احسانی عمیم و سلطنتی عظیم اولان رب کریم حضیره قدس اعلاده رفیع المقام و شرف عالیه ایچون جمیع عوالمده رفع اعلام ایتدیگک اول **سید المرسلین** حضرت لرینه سن صلوات احسان ايله که اسرار ربوبیتک امینیدر بدایع مصونه اسرار هپ منشور امانتمده مندر جدر مکنونات علوم غیبیه خزانه عرفاننده بالتمام مکنونوز اولمشدر قیامته قدر بشقه سی طرفندن اوزاد یله میه جق بر دست عبودیت پیوست ايله سننک ایچون بیعت ایدن حییکدر امن و کرامت و توفیق و عصمت ايله منصه تبلیغ اوامر و نواهییه اجلاس ایلدیگک سلطان عالی سریر کدر کلشنسرای عبودیت محضه ریاضتمده اول درجهده متمکن عبدیتکدر که خواص عباد هب انک مادونی قالمشدر پایدار مرکز نیابتک اولان اول **محمد** کدر که انفاذ اوامر و نواهی ربانیه نک شهباهندن ذره قدر انحراف ایتما مشدر سدره گاه ترقیاتده مهر منیر حضرت حضور اولان اکرام و بزم کارزار اجتهاد و جهادده شیردلان اولان **اصحاب کرام** حضراتنده شامل و تسلیم ايله مکمل اولسون تابعین و زمرة وارثین و بزره و جمله عباد صالحینهده سلاملر احسان اولسون امین.

﴿افندیلر﴾ بارقه روح کنندی عالمنده فعالدر **افندیلر** عالم ارواح اول عالم اول حضرتدر که اشارت امر اورایه صدور ایدر خزانه اسراردن اوامر ربانیه نک جلوه ریز ظهور اولدینی یر اورا سیدر اوراده ظهور ایتدیکی کبی روحانی اولان حال اختفا زائل اولور

وادرک اولنان سبب عیانی صورتی کیر ارباب حجاب شو کورینان
سبب ظاهر ایله برابر قالورلر انجق منور ساز درون اولان ارباب
نورایت سبیلرک ایچنده منطوی اشارت معنویه بی سبب کورلر.

بعضاً باطللردن دخی ارباب ریاضت بولنورکه جمع همت ایدیلرک
مقامه قدر وصول بولشلردر کندیلرندن جمع همت اثرلری بیه ظهور
ایدر چونکه روحده بوکا برتهئی حاصل اولمش اولیور بوندن طولایی
او مقوله باطللر کندیلرینی عالم ارواحده تحکیم ایدیلورلر زعمنده
اولورلرکه هیات.

بونلر اگرچه زعم ایتدکلری کبی اولیدیلر بلا تکلف همتلری
حاصل ومجتمع اولور ایدی وصادر اولان اشارت خفیه نک حکمنه
اطلاع ایدیلرک خصیصه سی کندیلرنده بولنور ایدی بو خصیصه
موجوده اولور ایسه جمع همت ایستر اخردن اولسون ایستر کندیلرندن
اولسون مساویدر نته کیم **خواص امت محمدیه دن** ترقیات روحانیه
اربابی بویله درلر.

بسم الله . لاحول ولا قوة الا بالله . ای رجال عوالم ارواح ای
اهل طمس وغیب ای رهبران ای شهنسواران میدان ای فقهاء ای فقرا
ای خواص ای عوام هیکز قولاق ویریکز کوزل دیکلا یکز بو حضورده
هیچ لایعنی یوقدر کوش عقل ایلر استماع وقلب سلیم ایلر ازعان ایتک
لازمدر.

سز شمدی اولیلر نشیمنکا هده سکزکه اوزرینه ابر رحمت ریزان
اولیور موآند برکاتی دزیلیور سز اولیلر بر دیوانده سکزکه عساکری

واردات غیبیه در مصالحی تدلیات سماویه در حاکمی امر نافذ ربانیدر
فلان علانک بونده مدخلی یوقدر کتاب منزل جلیک اسراری بی
مرسل حبیبک حکمتی بکا القا اولنمقده و بندن سزه ایصال قلمقده در
بو خصوصده بن یالکز وساطت ایدیلورم یوقسه بنده سزک کبی
همیز محکومیت مرتبه سنده اوله رق ارده مزده فرق یوقدر **حق تعالی**
قران کریمده حبیب مکرمنه **صلی الله علیه وسلم** **قل انما انا بشر مثلكم**
بیورمشدر مرتبه عبدیتی تحکیم ایتک وانسیت حاصل اولمق اوزره
بنده سزک کبی بر بشرم دینسی امر وفرمان بیورمشدر انجق
مفخر عالم صلی الله علیه وسلم **افندمن** بزم کبی دکادر ارده مزده یعنی
ذات قدسیت سمات پیغمبری ایلر امتک اراسنده فرق اولدینندن
شرف فرقیات رونما اولمق اوزره اول بالا پرواز اوج رسالت ایچون
{یوحی الی} تتمه سی رفع لوای اعتلا ایتمشدر بکا وحی اولنور یعنی بن
سزک کبی بشرم بکا وحی اولنیور بیورمسی اعلان فرق ایتمشدر بزم
ایسه ارده مزده فرق اولمیوب مکرکه بصیرت خصوصنده وانکشاف
حجابده تفاوتمز اولسون بونک ایکسی دخی ارده مزده کی تناسبی سلب
ایده مز.

قالدی که مولای عظیم الشان **{کل یوم هوفی شان}** بیورمشدر
شکیمه اهل ادعای تعظیم واعتلادن منع وردایدن وتلقیات وتبلیغاتده
ارباب عرفانی دخی دائرة ادب وخدمتده طوتمش اولان بودرکه
جناب یزدان **{کل یوم هوفی شان}** اولنجه تحویل احوال غیر محالدر.
ارباب معرفت وظیفه سی انجق حکمت قدوسیة الهیه بی نشر

ایدن پیغمبر ذیشان علیه صلوات الرحمن افندمزك درگاه رسالتپناهیلرینه
قبو اولمقدر او درگاه عالییه کیرمك ایچون بونلر بنی آدم جنسنه
واسطه تفهیم وتبلیغ اولمشلردر.

امین ومأمون انجق اول مستودع اسرار **ان والقلم وما یسطرون**؛
اولان جیب اکرمدر هر فرد آفریده اوزرنده ید علیا همان اول
رسول مجتبانکدر.

کیم بونی انکار ایده ییلورکه ادله عقلیه وبراهین ساطعه منکرلره
قارشو طوروب کوریلور خصائل عالییه و مکارم اخلاق **جمیع**
مرسلین علیهم السلام حضراتنده وارددر فقط جمله سنده اولان
خصائل واخلاق جلیله دن برخصلت جلیله بر خلق عظیم یوقدرکه
خلق عظیم محمدی اکا سرتاج ابتهاج اولسون **سید کائنات** علیه اتم
الصلوات واکل التسلیمات افندمزك هر خلق عظیمی هر خصلت
جلیله سی جمله سنه فائق وهر درلو کمالات رسالتپناهیلری حیطة عد
و بیانی متجاوزدر. ربم سحائب عوائد و عواطف لطف و مروت
ختمیتپناهیلرینی بزده سزده جمیع امتنه ده بارش ارآی دوام ایلسون.
افندیلر؛ کاربان عالمده یوجلیق هوای نفسانی ایله متناسب
و اعتقادات طبایع ایله متجانسدر چوق توقی لازمدر طامه کبرادن
نجاه میسر اولسون.

مفخر عالم صلی الله علیه وسلم افندمزك حدیث شریفده **الا یؤمن**
احدکم حتی یکون هواه تبعالما جئت به؛ بیورمشدرکه هوای نفسانی
دخی کتوردیکم شریعت غرایه تابع و منقاد اولدقچه اسلامیت

اوله مز دیمکدن عبارت اولان اشبو حدیث شریفك منظوق جلیله
کوره هوا هوس دخی سلطان شریعته قول کبی مسخر و منقاد
اولدقچه ایمان کامل اولمیه جق دیمکدر.

کیم که هوای نفسانی یی **پیغمبر مز** افندمزك تبلیغ بیوردقلری
شریعت مطهره یه خور برکوله کبی منقاد ایتمز ایسه ایمان نرده
کندوسی نرده در. شومالایسه نك امر تمیزنده طوغریسی تاب وتوان
کسیلیور همتلر نایردن قالیور.

برادر؛ خوشنه کیدن بر سوزك قبولنده بونلور اجرا ایدرسنکه
بو صورتله شریعت غرایه اتباع ایده یورم ادعاسنده اولورسن
استهزای ایده یورسن خوشنه کتمیوب کوجه کیدر ایسه بر دلیل
عقلی بر بهانه بولوب عمل ایتمزسن امر ونهی الهی یی استخفافی
ایده یورسن بونلر اسرار الهیه دن ایکی سردر هر ایکسی شان جلیل
جناب مولایه عاندر اول قادر قیوم کوریورسن که برات پارچه سنی
سکا آلت ایدوب لاقردی ایده یورسن بر کموک پارچه سی ده ایشتمك
آلتی اولمشدر ایشیده یورسن کوزك برزاردن عبارتدر.

قوای مجتمعه هب چاموردن ترکیب اولنش برهیکلده در. قوای
عاقله دماغنده ساکندر. عقلك فهمی یورك پارچه سنده یراشمشدر
اشبو آثار الهیه هب سنده ایکن سنك علیهنده بر حجت اولمشدر
بونلردن صکره هوای نفسانی یه کوره حرکت ایدر ایسك ارتق
زویه قاچرسن مخالفتده نصل بونلورسك سنی ده بنی ده خدا حفظ
ایتسون **العیاذ بالله**.

بسم الله بسم الله ای صاحب ولایت ای ناطقه پرداز موعظت
ای دائره نشین مشیخت ای صاحب منبر مکرمات ای درویش
خانقاه انابت ای سالک راه طریقت ای علما ای حکما ای ارباب
نقول معقوله ای ارباب عقول مقبوله نه دوشونیورسکز ایش ایکی
سوزدن عبارتدر یا وصات یا خود مطرودیتدر و صلتک باطن
و ظاهری و التی و اوستی و جسمی و روحی **جیب اکرم و رسول**
محترم صلی الله علیه و سلم افندمن طرفندن بیان و تبلیغ بیوردیغی
اوزره آداب قرآنیله آداب ایتمکدن عبارتدر بونک بشقه سی
قول و عملدن نه اولور ایسه هفوات نفسانیله در یا خود که طریق
شهوتمدن روحه یول بواش استراقات سامعه دندر بوکا گرفتار اولان
منازلاتی کشف ایده میوب انی واردات روحیه دن قیاس ایتش
و محک شریعت مطهره یه اورما مشدر بونک غلبه وجد ایله اولمی
ویا خود شاشقنقله ظهور ایتمی و هوای نفسانی یه موافقتله وقوع بولمی
دخی تصادف ایدر بعضا انسلاب شعور دن اولور که اگر حال انسلاب
استمرار ایدر ایسه اولخالده تکلیف جاری اولدیغندن معذرت
مسلمدر مؤاخذه اولمز ایسه ده اقتدا دخی ایدلز نوقت که انسلاب
زائل و عودت عقل و شعور حاصل اولور ایسه شریطه ادب دوچار
اولنان حالک حقیقتی اورتیه قویمق و انکارینه مبادرت قلنمقدر
مبتلا اولان بو حالده بولنش اولمسندن طولانی کنندی کنندینی لوم
و توبیخ ایتیلدر اینجه برشی اولمیوب اثر سکر اوله رق خلاف امر
اولدیغی حضاره اعلام ایلمه ایدر.

بعضاً دخی حال مخصوص اثری ده اولور که بعض ایات انکشاف
ایدرك کشف حقیقی یه ترقی ایده میوب عجزدن کشفیاته فریفته اولمقدر
اول حالده عقل شاشه لیوب ناپاک اولان نفس دخی لذتیاب اولدیغندن
میزان ادبیه سنجیده ایدیله میهرک تجاوز و وقوع بولور و اغزدن نامناسب
سوزلر قاجیریلور بوکا مبتلا اولان بیچاره مشهوداتی حکم وجودی
تحتنده ظن ایدر جاهلرک بیله بیلدیکی اوزره ظاهر اولان مقیاسدن
خبرسز قالمش اولان شو بیچاره نروده که ظاهرک حکمی نه ایسه
باطن دخی او یله اولدیغنی بیله مامشدر شویله که انسان هر نه کورر سه
کورمش اولمسندن طولانی بو بنمدر دیه ییلورمی یا خود یا لکن بن
کوردی کمندن بنمدر دینیلورمی عجباً بونک صاحبی اولمی خاطره کلزمی
بشقه لری دخی کورمش اوله مزمی بلکه خالق کورمش و فریفته اولمیله رق
ایلر وسنه چالشمش دینیه مزمی وای بیچاره اوزاغه آتمش ده خبرسز
قالمشدر و خلقده سو ظن بلاسنه اوغرامشدر حالبوکه سو ظن ایله
خلقی مقتون بیلانلر مفتوندرلر.

مظهر قرب الهی اولانلر بویله دکلدردن انلر خائفدرلر سنده
اصلاح حال ایت **ادب محض محمدی** ایله کسب صلاح ایت قرب
معنوی نیک ایوان عالیسی ایله افهام اهل اوهام اره سنده نه لر واردردن ایشته
وصلت اربابنک مذهبی بودردن مطرودیت ایسه والعیان بالله یا کلیا
مطرودیتدر که جناب مولایه افترا ایدن مشرکین و کفارک حالیدر
یا خود اسبابه مرتبط اوله رق بر مطرودیت اولور که اسبابی چوقدر
کسالت عطالت ادب سزک اخلاق ذمیمه فقدان اوصاف کریمه سنت

سینه دن انحراف شهره هدايتدن چيقيمق کي شيلر اسبابك جمله سندن در.
 بو مطروديت ايچون علاج يوقاروده وصلتده بيان اولنان شيلردر
 وصلتده آفتي مطروديتده کي احوالدر اوبونك دواسي بوانك علت
 وبلاسيدير. **برادرلر متابعت سنت سنيه حضرت رسالتپناهيه** مداومتله بکا
 ياردم ائمه ليسکز افندمز و مرشدمز و جناب مولايه وسيله مز کنديسيدر.
صلي الله عليه وسلم افندمز بزره کتاب و حکمتي اوکرتدي تزکيه
 بيوردي بيلديکمز تعليم ايدوب بزي کورلکدن جهالتدن قورتاردی.
 صاقتکز شو ارباب بدعت اولان غلاته الدائمکيز اهل بطالت
 يولنده بولنه يکز کنديکزي خلقدن ائي کورمه يکز امتك بيوکنده ده
 کوچکنده الکزدن کلدیکی قدر نصيحت ايدیکز صالح وفاسق مؤمن
 وکافر نه اولورسه علی الدوام بني ادمه معامله کز نصيحت اولسون نأديه
ماعلينا وعليهم وظيفه سني ايضا ايدیکز **والله ولي المتقين وحسبي الله**
ونعم الوكيل و صلي الله على رسوله غلة الخلق الهادي الى الحق وآله
 واصحابه اجمعين.

مقاله مبارکه ثالثه

بسم الله الرحمن الرحيم وبه نستعين يا حي يا قيوم حول وقوت
 سندن در سن عليم وعظيم سن برادرلر هپ اشيا بر راصله منتهی اوله رزق
 اوراده مایه دار اولور وانکله طبيعتنور بو اصول دخي ديگر اصوله
 واورده معدنه منتهی اولورکه هرشي مایه اصلنه وهر مایه معدنه وهر
 معدن دخي عينيت وجودينه واردقده طبيعتيله اوراده توقف ايدر
 وآفرينده کائناتك سلطنتي کنديسني احاطه اير.

جانب نهايته متسلسلاً رجوعی و رجوعه تناهياً ننزلی بدايتندن
 غايتمنه قدر هر دوشوب قالقدقه لسان حالی **هو الذي صوركم**
فأحسن صوركم آيتني تاليدر.

بوانتظام جايله طباع اشيا شاهددر. بوسر خفي بني آدم نوعي
 اکلر اما عقل کریم وقلب سايم اصحابی اولان آدميلردر يوقسه عقلسز
 يورکسز بشر عماي جهالتده يشار.

انسان ايکي عالمي مشتملدر. بريسي **عالم هيکل** که شو محسوس
 ومشهود اولان جسمدر. ديکري **عالم سردر** که عقل وروحدن مجتمه مدر.
 هيکلک عالمي سفلي اولديغندن کنديسنه تعلق ايدن فروعات
 دخي سفليدر.

عالم سر علوی اولديغندن کنديسنه تعلق ايدن فروعات حاله
 مشاکل اوله رق علويدر.

جسمه تعلق ايدن شيلر **يک ايچمک** وبو احتياجک متعلقاتي
 وبارتمق و او يومتق وکينمک هر انتظام حالني مستلزم اولان امثاليدر
 جمله سي هر حالده جسمک سفلياتدن اولديغنه دلالت ايدر. اما عقل
 وروح علوی اولدقلرندن بونلره معرفت علم حضرات قدس حقه ترقی
 حقايق اشيايه وصول واطلاع کي شيلر تعلق ايدرکه هپسنده عقل
 وروحک علويتنه دلالت واردر. شوقدرکه عقلک روحدن فرقي واردر.
 نور عقلک فروغندن اولان متعلقات اصله يعني عقله واصل
 اولسي کورمک و ايشتمکله در. مشهودات اولمليدرکه معناسني کوزآلوب
 ساحه عقله ايصال ايدمک و اورادن دائرة فکرتيه واروب ايچنده

وظیفه عقله عائد اولان شی استحصال قلنه بقدر .

مسموعات اوله لیدر که سامعه آلوب دائره خیاله ایصال ایلله جک و مرآت مفکره ایلله قارشولشدیر یله رق عکس انداز اوله جق خیالات دیدنه فهمه کورینوب نتیجه استکمال ایدیلله جکدره انجق نور روحك فروعی اوله دکلدرد مشهودات و مسموعاتدن مستغنیدره حجاب وجود ایلله نور روح منظمس اولسه یعنی سلوک و ریاضتله حجاب وجود ازاله ایدلسه آچیلان نور الهی بی یورک تلقی ایدرک اونور ایلله کورر قلب اول صورتله حجابدن ازاده اوله رق انکشاف ایدن نور روحه طوغری اعتلا ایتسیله فراست ایلله متصف اوله رق حقایق اشیا به نظر ایدر **اتقوا فِرَاسَةَ الْمُؤْمِنِ فَإِنَّهُ يَنْظُرُ بِنُورِ اللَّهِ** بومعنائی افاده ایلمشدر . بوحالك حصولی منبر صدیقیته عروج رتبه سنه قدر ترقی ایدر که ملک و ملکوت و قعر بهموت منکشف اولور .

وسکنه ارضك وقوعات دوریه سی ایلک دوکمه لری دخی چوزیلور . شوراسی اخطار اولنور که پرده شکاف هیکل جسمانی اولان ریاضت صورت صالحه ده اوله جق و روحی کندی مقام اعتلا سندن منع ایدن رصد لر طلسملر ازاله ایدیلله جکدره بوضورتله اولنجه مقربین قدس الهی زمره سنه التحاق و قوعبولور که وصول و اولحضرته دخول حجابك زوالی و نورك کمالی ایلله متناسب اولور .

انجق اشبو نور ایچون حجاب جسمانی مانع ظهور اولور ایسه وقوه فکریه هیکل جسمانیك مشاهده سیله مسلوب الشعور قالور ایسه اولخالده مظهریت درکات بعدیتده انحطاطدن عبارت اوله رق

متناسباً دخی بواسفل سافلینه قدر کیدر .

بعض ارباب ضلال و غوایت روحك عالم قدسه طیرانتی انکار ایدر لر حجاب ارقه سنده قالدقلرندن انکارده بولنیورلر یوقسه اویقو حالنده حجاب وجودك آچلمسیله برابر عالم قدسندن روحه وقوعبولان انعکاساتی تفکر و رؤیایك کیفیت نظامنی تدبر ایتمش اولسه لر بونمونه کافیدر و کندیلرینه قناعت کلور ایدی .

اوت اوله ییلور که صایقلنار شی تفکر طریقندن دماغه صعود ایدرک بعض خیالر مثالر کوسترسون بویله اولور ایسه بعض تخیلاتك غلبه سندن اولور و یاخود وجودك یورغو نلغندن و بعضاً طعامك بخارندن و سونج و قورقو کبی عارضه لردن دخی تولد ایتمش اولور بوکا حدس خاطری دینیلور .

آره لقدمه بونك جزم و نیتدن دخی تولد ایتدیکی اولور بونده براوفق فرق موجوددر که نیت صحیفه خاطرده ارتسام ایتیان بر کیفیت غیر معینه ایچون اولور و اویقویه وارمه دن اعمال صالحه و ذکر الهی ایلله اشتغال ایدلمش بولنور ایسه و عتبه سنیه حضرت رسالتپناهیدن استفاضه قلنور ایسه بروجه محرر حقیقتی معلوم اولیان بر خصوصك انکشافی نیت ایدلمش و استخاره طریقله اکا توجیه همت قلنمش اولسه دخی بومثللو رؤیایه ده استدلال دینیلور .

واکرنیت جزم اوزرینه اولوب فقط ذکر ایلله اشتغال ایدلماش و عمل مبرور سبق ایتماش و استفاضه دخی قلنماش ایسه بومثللو رؤیا خبطدن عبارتدر تخطرله قائم جزمك نتیجه سی دماغه صعود ایدرک

اوراده بر مثال کو سترمش دیمکدرکه **بوکاده کاذبه** دیرلر.

نه زمانکه بونلرک هپسندن خالی اوله رق احکام شرعیه به مغایر
برشیئه دخی اقتران ایتمزایسه وبروارد غیبیدن نشئت ایتش بونورایسه
رؤیای صادقه بودر تعبیره شایاندر روحک استکشافاتندندر.
اوت اصحاب ضالالدن برقوم ماده روحی دخی انکار ایتشلردر
وبرچوق سوز قارشیدر مشلردر روح امر الهیدندر **اقل الروح من**
امر ربی بونده کی امر معنویدر فقط لازم امر مادیدر.

بوامر معنوی ایله قائم اولان اول ماده ثقیله جسمدر جسمک
روح ایله قائم اولدیفنی انکاره مجال یوقدر. وروحک قیام وجودی
جسم ایله اولدیفنی ادعاسنه ممکن دلیل بولنه من جسم روح ایله قائم
وروح جسمدن مستغنی اولنجه تعین ایدرکه روح بر سر امریدر
وجودده موجود ایسه ده وجودک غیر یسیدر وکندی کندینه قائم
اولوب عرض کبی جوهره محتاج دکدر وجودک قوامی دخی انکله
حاصل اوله رق فقط کمال لطافتندن ادراک اولنه میوب وروحده
معناسندن منبجس بر ماده اولوب هیکلده جولان دم او ماده ایله
قائمدرکه اوده نفسدر.

نوقتکه بو ماده رهین فقدان اولور ایسه روحک جسندن
آیرلش اولدیفنه دلالت ایدر. معنای روح اولان مذکور ماده بی یعنی
هیکلده کی نفسی دفع ایدن اسبابک هپسی مقدراتنددر جسدتک
ویاخود هیکلک مابه القیامی اولان امرک انفکاکنی قضا اقتضا ایتش
اولور بونی اثبات ایده جک دلائل ینه کندندن حاصلدرکه خالق

تعالی حضرت تلرینک عظمتنه وعلیم وخیر اولدیفنه دلیدر. **الا له الخلق**
والامر دکلمی عالم خلق یعنی مادیات وعالم امر یعنی مجردات هب
کندینکدر مخلوقاتیدر **وهو علی کل شیء قدیر**

مقاله شریفه رابعه

بسم الله الرحمن الرحيم

قال رضی الله عنه

برادر حقوق الهیه بی کندی نفسنده اجرا ایدرسن وکندندن
چکوب حق ایله برابر اولورسن اولوقت نفسکی بیلمش اولورسن که
امن عرف نفسه فقد عرف ربه

واکر حقوق خلقی بیلوب تمامیه ایفا ایدرسک یعنی بیوکلره
حرمت کوچکلره مرحمت کوتولک ایدنلره اییلک. اییلک کوردکلرینه
معامله لایقه اجراسنده بولنوب خلقتک حکماسندن قبول نصیحت
واشرار مقوله سندن مباحدت ایلر ایسک وبیچارکانه معاونت ایدوب
اصحاب اقتداره دخی ایلشمز ایسک یعنی خلق سندن امین اولوب
جمله سنک امنیتنی قزانورسک نفسکده حسن سیاسته موفق اولمش
ومولا تعالی سندن راضی اوله رق ابنای جنسک اولان قرداشلرک
ایله ده حسن معاشرت ایتش اولورسک که اولخالده هم ارباب عقل
وحکمتدن معدود اولورسک وهمده جفا واذادن قورتیلورسک.

اگرچه نفسنی بیلمیه رک جهالتده وخلق حقنده دخی قیمت
شکندلکده قالور ایسک اولخالده دخی هم کندینه یازق ایتش وهمده
غضب باری به اوغرامش اولورسنکه حمقادن معدود اولورسک ولیئم

صایلو رسك صاقن برادر قعلجمی اوستنه صچرادوب کندینی آتسه
یاقه و دریای هوا و هوسه طالب بو غلمه .

سنی یوقدن وار ایدن **ذوالجلال حضر تارندن** حذر ایت نفسك
اوزرینه یاردم ایت . بو نفس خیشك سبکسزلکندن قاشلرندن
قوریلورسك خسراندن ازاده اولورسك عقاب و حسابدن امین
اولوب احبابندنده دور اولورسك .

قپورده آچیلور رمزۀ اخیاره دخی قاویشیلور .

{ بیت }

{ النفس معنی الفتی یعلو اذا اتضعت * وان تعالت فقد رالشخص موضوع }

انسانده کی معنا نفسدر تواضع ایدر ایسه رفعت بولور خاک
اولکه خدا مرتبه کی ایلیه عالی تکبر ایدر ایسه بالعکس قیمتی قالمز دیمکدر .
بو نفس دون ندن سنی بویله زبون ایده یور خیالات کاذبه اوزرینه
تأسیس بنیان ایلور نفسك نخوتی بسته خیال شهوتدرکه

الضدان لایجتمعان

نفس اولیله درکه افکار باطله ایله اوج افلاکده جولان ایتدیکی
حالده سنجیده میزان قبولی اولان بر مقصد ایچونده بحر مذلتك قعرینه
قدر طالب تنزل ایدر .

نه فنا بو استحقاقسز ارتفاع نه مذلت بو تنزل واتضاع بر حکمتی ده
یوقدر مجرد شو اخلاقدن منبعثدر .

بونی براقوب شهبال عرفان ایله امور عالییه پرواز ایتمه ایدر
ادب دین ایله غایت علم یقینه کیمه ایدر کر چکدن اوج عزت و مسرتۀ

بویله اعتلا اولنور . هوای نفسانی یه مخالفتده بولمیلدر میل شهوانی ایله
ضد کیمه لیدر قوت عزیمت ایله کیجه لرك قرانلغندن استفاده یه چالشمه ایدر .

{ تعود سهر اللیل * فان النوم خسران }

کیجه لری اویقوسز کچورمکه الشمه لیدرکه اویقو خسراندر .

{ ولا ترکن الی ذنب * فعقبی الذنب نیران }

کناهلره یا قلاشما لیدر صوکی آتشددر .

وقم للواحد الباری * فلقرآن خلان

عبادت ایچون کیجه لرده قائم اولمیسك که قرآنك ده دوستلری
وارددر .

اذا جنهموا اللیل * فهم فی اللیل رهبان

او دوستلر کیجه نك قرانلغی چو کدیکی کبی رهبان کسلیلورلر
یعنی ترك لذائذ ایدوب عبادتله مشغول اولورلر .

ینام الغافل الساهی * وما فی القوم و سنان

ارباب غفلت اویقو ایلله امرار لایل ایدرلر کر وده عبادتده اویومش بوانه من .

ویلهمو الجاهل اللاهی * واهل الله یقظان

جاهل مشغول ملاهی اولور . بندکان الله اویقوسز قالور

فلا یلهیموا اهل * ولا حزب و اخوان

بونلری قوم و قبیله و اهل عیال اشغال ایتیمور .

هموا والله قتیان * اذا ما قیل قتیان

آدم دینلدیکی وقت الله ایچون ادم بونلرددر .

بندکان خدا اشته بوکون اهل تقوادرلر بونلره بکزر قالمشدر .

لذات دنیویہ نك هپسندن كچمشلر ایدی عادات و مألفاتی براقشلر ایدی صدق طویت ایله مولایه عبادت ایدرلر ایدی **انما الاعمال بالنیات** حقیقته واقف و بو حقیقتك یاننده عاكف اولمشلر ایدی چوغیده ازی ده فدا ایتمشلر ایدی یدكلی یمك سد رمقدر کیدكلی لباس ایجاب تستردن عبارتدر بشقه سنی آره مامشلدردر .

قوم اذا غسلوا الثياب رأيتهم * لبسوا البيوت وزرروا الابواب شاعرك دیدیکی کبی چامه شورلرینی ییقادقلرنده او طه لری کینوب قپولری دوکه ایدرك ایلککلرلر ایدی مولادن خشنود اولمشلر **الله** و بس دیمشلر **جناب ارحم الراحمین ده** کندیلرینه نعمت وصلت احسان ایتدی ذرات اکوانده تأثیر و تصرف و یردی مخفیات اسراری کوستردی یول بودر بونلرك سیر و سلوکنه اتباع ایتمه لیسك تاکه کندیلردن صایله سک مولا بونلردن راضی اولمشدر کندیلری دخی حضرت حقه رضاده بولنمشلدردر .

والله ولی المتقین .

﴿ مقالة مكرمة خامسة ﴾

﴿ بسم الله الرحمن الرحيم ﴾

قال رضى الله عنه

ار اولدرکه کسه یه خصومتده بولنمز مکرکه الله ایچون کندی نفسنك خصمیدر . فتوت ارباب ایمان حقنده مفاخرت ایتماکدر صدیق اول یار شفیق که اکا کوانوب مستریح اولورسك .

اصحب من الاخوان من قلبه • اصفی من الیاقوت و الجواهر

اوله قرنداشی کورشمك ایچون انتخاب ایت که یورکی یاقوتدن وجوه ردن زیاده صافی و خالص اولسون .

ومن اذا سرک اودعته * لم يظهر السر الى المحشر

اوله که ودیمه ایتدیك راز نهاتی محشره قدر صاقلسون .

ومن اذا اذنت ذنبا اتی * معذرا عنك کستغفر

سن قصور ایتدیك حالده استغفار ایده یور کبی کندیسی بیان معذرت ایده کلسون .

ومن اذا غیبت عن عینه * أزعجه الشوق ولم یصبر

کوزندن نهان اولور ایسك صبر سزلق ایله اشتیاق ایله کندیسنه انزعاج حاصل اولسون .

الله ایچون قرنداش ایدیلور ایسه واجبات ترتب ایدر قرنداشلقدن طولانی برحق واجب اولور غیابده حضورده محافظه اولنسی منفعتنه چالشمنسی لازمدر . سزلرده بنم قرنداشلرم کورشدیکم ارقداشلمسکن طاعت خدا و مراقبه مولایی سیزه توصیه ایده رم اولدرجه ده اولمیدر که سیزك ایچون نزد الهیده محبوب اولما لیم دوستك سکا عیبلرینی کوسترن کناهلرندن قورقودندر . قرنداشك ده طریق حقه رهبرلك ایدندر . حق تعالی حضر تلریله کسب انسیت ایدن کسنه کمال تأمل ایله قران کریمك تلاوته مداومت ایدر ایچنده کی اوامر الهیه امثال ایلر آداییله تأدب ایدر . **جناب پیغمبر ذیشان** علیه صلوات الرحمن افندیملزله ده حق صحبت اخلاق عظیمه و آداب کریمه رسالتپناهیلرینه کوره آداب و اخلاق پیدا ایتك و سنت و شریعت

محترمه سینه متابعت ایلمکدر.

اولیای کرام حضراتیله حق صحبت دخی آداب جلیله لریله تأدب ایدوب سیرت و طریقتلرینه متابعتدر بونلردن خوشنه کیدنلری انتخاب ایدوب من کل الوجوه متابعت و اقتدا ایتمیانلر هلاک یوانه کیتمش اولور.

{ والماقة للمتقين }

اولیا اولانلرک حاللری بر درجهیه قدر واصل اولورکه نه یاپر ایسه الله ایچون یاپر المسی ویرمسی دوشمسی قالمسی فقری غناسی قید و اطلاق هب بالله اولور.

چونکه ذکر نعمت شکر نعمتدر تعیین حدود ایدن ضابطه هر حالده شریعتدر انسان هر نه سویلسه یاننده رقیب وعتید یعنی ایکی فرشته حاضر در . بکا ایکی خصلت احسان بیورلمشدر که شیخ منصور حضرتلرینه ویرلماش ایدی . مشارالیه عاشق ایدی بن معشوق اولدم عاشق ایسه یوریور معشوق ایسه نازانور بکا اعطا بیوریلان حکمت مشارالیه ویرلماش ایدی . بر درجهیه قدر واصل اولدم که اگر قلبه اطاعت ایتمز ایسه مولایه عاصی اولورم مطالع قلبیه اول مرتبه ده او امر الهیه ایله موافقت کسب ایلمشدر بوده مرتبه عبدیتدندر که **{ ان عبادى ليس لك عليهم سلطان }** شان جلیله قائمدر . بنده حق اوزرینه دشمن حق نردن تسلط ایده ییلور حزب الهی حفظ الهیده در نصل بونلره یول بولور وای باشنه که شقاوت ازلدن کندیسنه مسابقت ایتمشدر . حزب الهی ایسه سعاده سبق

ایتمشدر . اسرار طاهره بونلردندر غلبه قاهره بونلرک طرفنده در بونلر نفس الدیقه محاسبه نفس ایدرلر بزلرده هر نفس الدیقه محاسبه نفس ایدوب اتهام ایتمیانلر دیوان رجاله قید اولزلر کیده مزلر بوبرکات وافر و انوار باهره هب دریای جود کرم **محمدیدندر رسول مؤید سید عظیم** حضرتلریدر .

صلی الله علیه وسلم رؤفدر رحیمدر کمال صدق ایله بزاکا اتباع و انقیاد ایتدک وبروفق امر الهی اطاعتنده بولندق بویله اولمیانلر تهلکه یاننده طوررلر .

{ شعر }

على أي ظن رد قاضي الهوى الدعوى * وفي القلب سر نشره قط لا يطوى
قاضی محکمه عشق و محبت نه ظن ایدوب رد دعوی ایده یورکه جایکیدرون اولان رازنهانک اچلماش بوی افشان اولماسی ممکن دکلددر .
غرام بحبل الروح منعقد على * وثيقة عهد كلها البر والتقوى
تارجان ایله باغلانمش بر سودای محبتدر که یازلدینی وثیقه بر وتقوادن عبارتدر .

اقت عليها في حبي الصدق حجة * لها من معارج الهدى الغاية القصوى
دائرة صداقتده بیان ایلدیکم دلیل ثبوتی درجات هدایتک غایات قصواسندندر .

وزمزم مت کاساً حل فيه مدامة * حرام على اهل التجاوز والدعوى
زمزمه ساز اولدیم جامه طولدیریلان او باده تجاوز وادعا اربانه حرام اولمشدر .

و صنت له سرّاً قدیماً حدیثه * عن الحجج الاثبات خیر الوری یروی
اول علاقه حب وولانک اوپله اسرار قدیمه سنی صیانت ایتدم که
افضل عالم اولان فضلاى عظامدن روایت اولنمشدر.

خزانة وصل کل من رام فتحها * فقد اغلق اللذات واستفتح البلوی
اوپله بر وصلت خزینه سیدر که قپوسنی اچق ایستیانلر لذات
دنیویه نک قپولرینی بند ایدوب ابتلا لره میدان اچق لازم کلور.
و اول ما یقضى على من یرومها * قبول البلا والبعد عن موطن الشکوی
بونک ارزوسنده بولنانلر اچون حکم ایدپله جک برنجی شی قبول
بلا و ترک اشتکادر.

وفي السدرة القعساء منها جهابذة * قد اتبعوا المختار في السر والنجوى
سدرة علیاسندن اوپله جهابذة رجال واردر که باطن و ظاهر ده
اثر پیغمبریده کیتمشلردر.

وصاموا عن الآثار صوم مودع * فصانوا حماهم من هذیم ومن حذوی
ماسوادن وداع ابدی ایله امساک ایدوب اوته کندن بریکندن
مصون الساحة اولمشلردر.

سرت عیسم والضوء کفکفه الدجا * وتاهت ادلاء القفول عن الفحوى
قرا کلک چوکوب انوار ضیائی طوپلادیغی وقتده رهبرلرک
اکلایه مدیغی یوللره قافله بند عزیمت اولمشلردر.

اخذت وحیداً رایة السیر بعدهم * اجوب طریقانی الدروب هو الا سوی
بنده یالکز یولجیلنک لواسنی بونلردن صکره رفع ایدوب اک
طوغری یولده کیده یورم.

ونصّیت فی اثنا المسیر مذاهباً * علی نصّها بین اولائی صحت الفتوی
اثناى سیرمده بیان ایلدیکم یوللرک تعریفنده صحت فتوایه
کچمشلر نزدنده حکم اولنمشدر.

کذا من اراد الحب فلیحتفل به * والا فما نیل المنی لقمة الحلوی
ارزوی محبتده اولانلر ایشته بویله احتفال واعتنا ایتهلیدر یوقسه
بلوغ مقصد لقمة حلوی دکلدر.

مفخر موجودات رسول اکرم صلی الله علیه وسلم یدمقدس
رسالتپناهیلرله ارشاد قپولرینی آچوب بو زمان اچونده بکا تسایم
بیورمشلردر. بو کوردیککز نور بدیع الظهور طریقت مرتضویه
علویه ده نور محمدی رفاعیدر تشریع و ترتیب ایدن اول نور اکمل
حضر تدرینه اتم وافضل صلوات وتسلیمات روان اولسون.

• { مقالة فاخرة سادسه } •

قال رضی الله تعالی عنه

طریقتم بدعت قاریشامش دیندر. و فتور و کسلنسز عملدر
طریقتمز حواس خمسہ یی ضبط وحفظ ایتمکدر و نفس الدجّه وقته
رعایت ایلمکدر و درونی پاک قلمقدر و جمیع حواس ایله ذکر مولایه
مداوم اولمقدر طریقتم بدعت قاریشامش دین وریا کیرممش اعمال
صالحه در ماسوا ایله مشغول اولیان قلب و شهوته اتباع ایتیمان نفس
صاحبی اولمقدر طریقتمز کتاب منزل و سنت بنی مرسلدر.
معلوم اولسونکه درویش اتباع سنت شراهنده کیتدجکه
طریقتمده در انحراف ایتدیکی کبی ضالالتده در.

طریقتمز ایسته مامک اسیرکه مامک ادخار ایتمکدر وهر شیئک
ید قدرت الهیه ده اولدینی بیلمکدر وهر کسسه نه ایچون یرادلش
ایسه اکا قولای کلور حدود مشروعه تجاوز اولمیه جقدر. عون
وعنایت ده جناب باریدنر.

فی الحقیقه طریقت آچیق بر یولدر مقام تمکنه واصل اولیانلرک
بعضیسنی غلبه حال ادعا و شطحیاته سوق ایدوب حدودی تجاوز
ایتمشدر.

بونلره بر طاقی حسن ظن ایله منقاد اولمشلر و بر طاقی جهالت
سوق ایتمشدر هر ایکی طاقم دخی تهلکه یه اوغرامشدر.

معلوم اولسونکه طریقت سود کبی بیاض بر یولدر طریقتده
قول و عملدن نه وارا ایسه ظاهر اولسون باطن اولسون دائرة شریعتده در
زیرا شرع شریفه مغایر اولان طریق فعل زندیقدر.

طریقت ندر آمنت بالله دیمکدر دائرة محدوده شرعیه ده طور مقدر
حق تعالی **حضرتلری** طرفندن نه تعظیم اولنش ایسه تعظیم ایتمکدر
حق تعالی نه نهی بیورمش ایسه اجتناب ایلمکدر بوندن صکره ده
نصل طریق اولور حقدن صکره ضلالتدن بشقه نه واردر.

طریق رجالندن بعضیلری عادات زائده چیقاردیلرکه بونلری
اهل عرفان اولان رجال طریق وسائل عبادت ایله طبعتمش اولان
بعض نفوس بشریه یی بویولده عبادت و طاعته منقاد ایتمشدر انجق
او مقوله نفوس مطبوعه طهارتیاب و پاک اولدینی کبی عاداتدن
مشروعاته نقل ایدیلور ایدی و بو حکمت انوار **سید عالم صلی الله**

علیه وسلم حضرتلرندن اقتباس اولنشدر سنت سنیه نبویه ده بوکا
مقیاس انخا ایدیلرک چوق شیلر بولنور.

انجق ناکامل اولانلر بو مثللو عاداتی تعظیم ایدوب عبادات
جمله سندن عد ایتدیلر بلکه عبادتی اهل و عادتله اشتغال ایدیلر بونلر
فی الحقیقه کار بان ایله برابر کیده میوب اچ صوسز یولدرده قالمشدر.
صاقن ای طالب ساوک بو مثللو عاداتی عبادته قارشیدر مه زیرا
مباحاتدن معدود اولان عادات مستحسنه مخلوقک عقلنه کوره ترتیب
اولنشدر عبادت ایسه امر خالق الکائنات ایله قائم اولمشدر.

بو مثللو عادتله خصوصینده شو قدر دیه بیلورسنکه نفسی
جناب حقه سوق ایتمک ایچون غضب باری یی موجب اولیه جق بعض
شیلر ایله الشدیر یورم انجق راه حق اتباع ایچون احقدر.

{ والله ولی المتقین }

طریقتده رأی خودی ایله عمل ایدنلری رد ایدرلر زیرا طریقت
اب وجددن میراث قالمز سمی و اجتهاد یولیدر چالشمه لی حقدن
اوتانوب تأدیه ایتمه لی کوز یاشلرینی دوکمه لی.

بعض جهله طریقتک کفتکو ایله قزانیه جفنه ذاهب اولمشلر
هیئات نه قیل و قال و نه مال و منال و نه ظواهر اعمال ایله اولور انجق
صدق و انکسار و ذلت و افتقار و اتباع سنت سنیه حضرت بنی
مختار و ترک ماسوا و اغیار ایله اولور.

• { مقاله خاتمه سابعه } •

قال رضی الله عنه

{ افندیلر } مولای سون تواضی اوکرانور علایق دنیویه دن بتون بتون منقطع اولوب هب احوال و اشغالی براقه رق ذکر الهی ایله مشغول اولور .

شویله که مولادن ماعدا برشی ایچون کندیسنده میل و رغبت اثری براقز حقیقت عبادت ایله قائم اولوب اسباب احتشام وزینت اراه ماز . اقتدار و غنا اصحابندن اولسه دخی سریر عز و رفعتی الله ایچون ترک ایدوب شو قطعه نك مضمونه موافق اولور .

**ترك المنابر والسریر تواضعا . وله منابر اویشا و سریر
ولغیره نجی الخراج وانما . نجی الیه محمد واجور**

منصه عز و رفعتدن تواضع ایدوب و از کچمشدر حالبوکه استیه ایدی اولور ایدی بشقه سیچون جبات اموال جاری ایه ده کند سیچون محمدت و مثنوبات جبات اولنور .

{ افندیلر } عبدیت او یله در که افندیسندن بشقه نه وار ایه هپسندن کچمک اوزره حق ترتب ایتدیرر عبدیت جزئیات و کلیاتدن فراغدر . عبدیت قلبا ترک قصد و طلب مزیتدر عبدیت قرداش وارقداشلره تفوق واستحقاقنی کور ماکدر .

عبدیت حدود طینت ادمیتی تجاوز اتیوب یاننده طور مقدر . عبدیت مقدرات الهیه نك تحت مجاریسنده خضوع و خشیت کتور مکدر ماسودن آزاده سر اولوب مرتبه حریته ارتقا اتمدکچه قول کامل اوله من کمال اغیارک رقیتندن بتون بتون آزاده اولوب حریت استحصال ایتمکدر .

{ افندیلر } بنی دینجیلک تخته سی ایتیه سکز خانقاهمی حرم وفاتمدن صکره قبرمی صنم ایلیمیه سکز . عبودیت خالصه ایله منفردا ایشام قلعمی جناب مولادن نیاز ایتدیمکه بوانفراد ایله جمعیه داخل اوله یم بلکه ده وفاتمدن صکره بو مقصده واصل اولورم جمعیت ربانیه نك حصولندن صکره هر شی قولایدر .

اذ اصبح منك الوصل فالکل هین * وکل الذی فوق التراب تراب

تصحیح وصات ایدیلور ایه هر شی قولایدر که طوپراق اوستنده نه وار ایه عاقبت طوپراقدر . کمالدن نقصاندن شیخده نه حال بولنور ایه درویشان و مریداننده نمایان اولور بطناً بعد بطن تسلسل ایدر .

اگر شیخ حال کمال اصحابندن ایه مرید کاماک حالی دها عالی اولور یعنی کمالی تراید ایدر و مرید ناقص دخی کماله ایریشور .

اگر حال شیخ نقصانده بولنور ایه مریدانک ده کاملی دوچار نقصان و ناقص بتون بتون پریشان اولور * انجق کریم اولان مولای متعالك و هب و عطاسی بشقه در احوالده تأثیر احوال جاری اوله من ار اولدر که اثری کندی کتدکدن صکره ظهور ایدر .

ان آثارنا تدل علینا * فانظروا بعدنا الی الآثار

بزدن صکره اثرلیمزه نظر ایدیکز که آثار من حالمزه دلالت ایدر . کندیکزدن صکره یه قالمق ایچون اثر ذل انکساری براقه لیسکزد دعاویدن تجرد ایتدیکزک دائرة استعمالدن چیقدیغکزک باب رب الاربابده مذات و مسکنتله طور دیغکزک فقرا یه محبت ایدیگکزک اثرلری سزدن صکره قالمه ایدر . فقرا و علمایه محبت و مقدراته موافقت و جناب مولایه تسلیمیت و سنت سنیه حضرت اشرف موجوداته متابعت آثار باقیه کزدن اوله لیدر .

مغرو و اولمقدن حذر ایتمه لیسکنز و قته مغرو و اولمق اهل عرفان نژدنده
هیچدر. چونکه ارباب عرفانه کوره طاعت حقه کچور میان زمانلر قیمتمدار
اولیوب الشراح صدر ایچون زماندن برشی استفاده اولنور که قیمتمدار اولور.
اوت **من سن سنة حسنة فله اجرها و اجر من عمل بها الى يوم القيامة**
کیم که اعمال حسنه دن برشی ایجاد ایدر ایسه کندیسى نائل ثوبات اوله جنى
کبی انی ایشلیانلرک دخی ثوباتنه نائل اولور. **ومن سن سنة سيئة فعليه وزرها**
ووزر من عمل بها الى يوم القيامة اعمال سيئه دن بر عمل ایجاد ایدن دخی کندیسنه
وبال وعقاب ترتب ایتدیکندن بشقه انکله عمل ایدنلرک وبالنه دخی مستحق اولور.

مالی و الفاظ زید * و وهم عمر و بکر

وجه الشريعة اهدى * من سر ذاك و سرى

زید و عمروک سوزلری ننه لازم عمرو و بکرک و همی ده شهره
شریعت اندن ده بوندن ده آچقدر.

برادریم باقر میسک چو جق طوغنجه الی قپالی اوله رق دنیا یه چقیور
انجق دنیا دن کیدنجه آچق براقیور. کلیشنده حرصنی کوستره یور کیدیشنده
حرص ایتدیکی شیدن استفاده ایده میهرک الی بوش قالدیغنی بیان ایتک
ایستیور **کفی بالموت واعظا کفی بالموت واعظا** اولوم کافی بر موعظه در.

ابکی و مثلی من یبکی اذا سبقت * قوافل القوم اهل العلم والعمل
بکاء قوم للقباء الوالین به * و انی الخائف الباکی من الزل
ارباب علم و عمل کو چوب کچد کجه اغلام بنم کیدر اغلیانلر سود کلرینه قاوشمق
ایچون بعض اغلیانلر واریسه ده بنمکی خطالردن قورققدندر برادر! اخر امر ده
ماحصلک سوزدن و غایت اجتهادک کندینی الداتمش اولمقدن عبارت قالمسون.

بدات بالخنا بياضك احمر * و خدعت فيه و قلت شعری احمر

آغران صاحب لری قنا ایله قرمز یه بویادک ده خدعه ایله صاحب لرم
قرمزیدر دینورسک * برادر صفوف او هامی عسا کر همت ایله یاروب قرب
معنویه اشهبسو و اصدق طویت اول کائناتدن یوز چو یروب مکون الا کوان
حضر تلرینی دوشوک. یولده قالماق و سرمزل مقصوده وارمق ایچون
ینه کندیسنه التجا ایت. احتیاجندن افتقارندن بیراق آچوب عجزینی مذلتی
اعلان ایت. اولادک عیالک سکا حجابدر مانع در مال و منال دخی حجابدر.
وجودک ده حجابدر بو حجاب بو پرده لری یرتمق لازمدر تیقظ بیله سکا
حجاب اولور. غفلتده حجاب اولور. زیرا کندینی متیقظ کورمک غفلت
عظمانورانی قیاس ایتک ظلمت کبرادر. حصول شرف و وصول ایچون
هر شی موانع دندر. هر شیدن تجرد ایدله لیدر. مقصود حقیقی یه
واره جق یولی بولمق ایچون هر شیدن برآرملق بر قپو بولوب چقی
ویرمه لیدر. معبود حقیقیدن بشقه برشی دوشونما لیدر.

کل العلوم اذا تخللها السوى * صارت لداعی الانفصال معالما

ماسوا قاریشور ایسه آرتق علوم دخی مداراتصال دکل سبب انفصال
اولور * اول کیمسنه یه تعجب اولنور که جناب مولایه وارمق ایچون یول
بولوبده صکره ماسوا ایله قالمشدر.

عجیانصل یشایه بیلور **انبیوا الی ربکم** فرمان عالیمی جانب الهیدن
صدور ایتمشدر. شومد عیلرک قغیسی حضورنده بولنان بر فقیری مالامال
غنا و اغنیادن اولانی همحال فقرا ایده مز ایسه فی الحقیقه هیچدر.
هله ادعا صرف رعوتدر قلب او رعوتنه تحمل ایده میهرک

لسانه القا ایتدجکه احقك لسانی سويلر. **برادرلر!** طبعته موجود اولان
ظلمت مشاهده انواره ماندر شو کائناتی علی وجه العموم کوزل کوزمک
صدق محبته دلالت ایتسه ده علی الخصوص استحسان اولنسی مورت ظلمتدر.
برادرلر! صدق ایچون هم مقام همده حال واردر که هر ایکسی
کوزلدر. آنجق حال تلون دیمک اولدیغندن و مقام تمکیندن عبارت
بولندیغندن رتبه ثابته مقامدر. اغیارک سسنی ایشتمکدن صاغر اولنلر **المن**
الملك اليوم! ندای جیلنی ایشیدرلر فرسران کبر و نخوت و غرور و انانیت
اولمقدن چکینورلر ادعای تفر و اقتدار ایده مزلر تحت قهر عبودیتده قالورلر.
زبان زد بعض متصوفه اولان وحدت وجود سوزندن دم اورمق
و شطوحات و طامات کبی شیرله بولا شمقدن حذر ایدیکز.

مسلمدر که کنهکار اولمق کافر اولمقدن قولاید. قرآن کریمده
ان الله لا یغفران یشرک به بیورلمشدر که شرک و کفر عفو بیورلمز و **یغفر**
مادون ذلک لمن یشاء فرمانی موجبجه ده عفو سیئات داخل دائره ممکناتدر.
هله بر آدمی هواده اوچیور کورسه کز میزان شریعت ایله افعال
واقوالنی سنجیده ایتدجکه اعتبار ایتیکز. بونکله برابر شرعا مردود اولدیغنی
تین ایتدجکه ده حضرات صوفیه نک هر قولی هر فعلی انکار اولنه مز
مغایر شرع شریف اولمیانلرینه تسلیمیتده بولنه لیسکز.

برادرلر! ماسواذن دهاقور تولماش ایکن حقایق بحثنه کیر شمک معرفت
دکل نفسانی شهوتدر. هوای نفسه اتباعا حق بر اقوب باطله قوشمق ایجه
ضالاندر. معرفت الهیه ایچون برنجی قیو قدس جناب حق ایله کسب انسیتدر
زهادت دخی مقصود حقیقی به طوغری آیلان ایلک آدمدر جامع کالات

ولایت اولان اولیا مقام نهایتده تمکین ایتد کدن صکره سائر خلقدن کندیسنده بر
فرق کورمدیکی حالده مظهر اولدیغنی نعمت الهیه نک مشاهده سیله متحقق اولور
شهره مصطفویده کیدر که **اول مفخر عالم صلی الله علیه و سلم**
حضر تدرینه قرآن کریمده **قل انما انا بشر مثکم یوحی الی** بیورلمشدر بو
آیت کریمه ده نوعیت ادمیتده اولان مثلثت ایراد و نعمت قدوسییه دخی مجملا
در میان اولنش اولدیغنی مثللو متمکنین اولیادخی شهود نعمته بویه تحق
ایدرلر. بنم رایجه جامع کالات ولی سائر خلقدن کندنده فرق کورمدیکی
حالده شهود نعمت ایله متحقق اولور انجق سویلما اعتراف ایتسی دخی
شکران نعمتدر شو قدر که **من آذی لی ولیاً فقد حاربنی** بلیه سندن عن جهل
یلمیانلری قور تارمق ایچون نائل اولدیغنی نعمتک قدر و قیمتی لدی الحاجه
بیان ایده بیور آنجق اشبو حکمه رعایت و خود بینک و غرور و تفوق کبی
شیلردن مباحدت ابدوب انوار هدایت محمدیه دن اقتباس صورتنده اولمیدر
و کندک نفسنده محو محض اوله رق خلقدن مدح و ذم نه ظهور ایدر
ایسه عندنده یکسان و فقر و غنا و عزت و ذلت نظرنده مساوی اوله جقدر
چونکه بقای محض و اقتدار مطلق حق تعالی نک بر اکنه مختصدر یلمه لی
قول ندر عدم محضدر عجز و ضعفدر **خلق الانسان ضعیفاً** آیت کریمه سنک
منطوق عالیسی اوزره انسان قوتسز یارادلمشدر

حاکم و آمر حضر تدرینک فعال مطلق اولوب بر شیله مقید اولدیغنی
واحکام و اوامرینک نفوذینه مانع بر قید بولنمدیغنی بیهلرک تسلیم ایتمیدر

ان ربک علی کل شیء قدیر

مقالات و عظیمه رسیدة حد ختام اولدیغندن کلمات حکمیه به شروع اولنور

١ معرفت الهیة ده حد غایت بلا کیف ولا مکان وجود حضرت مولایی ایقاندر.

٢ توحید قلبه بروجداندر که تعطیله ده تشبیه ده مانعدر.

٣ ماسوا ایله مطمئن اولق بر قورقودر مولادن قورقمده سوادن اطمئنان بخشادر.

٤ هر حالته بر حال ربانی وارد اکر انی بلسیدک ید قدرت ایله حرکت وسکونده بولندیغنی اکلار و کوررسنکه مسخرسک.

٥ مشقت وحساب بشر هب ریاست وشهوت ایچوندر که هر غایت بونک ایچندهدر.

٦ بوخرقه طریقتی بریلانجی تلویث ایتشددر که باطن بشقه و ظاهر بشقه در دیمشدر اما مر د عرفان باطن شو ظاهر ک درونی اولدیغنی بیان ایدر.

٧ فرقان کریم بتون حکمتلرک دریاسیدر.

٨ هب آیات ربانیه یت کتاب منزل آیت جامعه دره بونک ایچون بواطن علیه سنی اکلا یوب ظواهر شرعیه سنی التزام ایکی غنیمت اولمشدر.

٩ مرد زور افکن تمکین الیوکسک طاغک ذروه سنه قونیلان بر صریق اوزرنده بولنسه وحسومک فورتنه لری اسوب صاور سرقلنه دخی تغیر طاری اولمز.

١٠ ذکر خدا مصونیت بخش حادثات ارض وسمادر.

١١ یورک تمیز اولورایسه لساندن ای سوز جریان ایدر چونکه محصول جنان سرمایه زباندر.

١٢ بر دلشکسته فقیر ایچون غیرت مولا ملک کسرای بر هو ایدر صوفی

امور ذاتیه سنک تدبیر یله اشتغال ایتمز مدبر حقیقی یه تفویض ایدر.

١٣ مظهر شر اولان کسنه ممکن دکل دوام انتظام ایله مؤید اوله من.

١٤ نفوس بشریه در کاهک کنیش اولمسی تریناتی عمامه و فراجیه لی

شیخی ایستر که احتشامه میل ایدر همت قلبیه بوکا اهمیت ویرمن.

سؤال اوزرینه نصیحت وجواب یولنده کتاب الحکمده مندرج

نطقدر که بر میزان عرفاندر بیورر لر که خراسان صوفیلرندن بعض کسان

ابن شهریار نامی صوفی کبیر قدس سره ایچون روحانیتی ترتیب کرده اولیاده

علی الدوام حائز تصرف تامدردیر لر که بو اوله من. فعال جناب مولای متعالدر

ارباب قلوبه کوره ثابتدر که نیابت محمدیه نوبت ایله هر عصرک رجانه توجیه

اولنور و مراتب ایله متناسب اولور یوقسه دینیلان تصرف بر مخلوق ایچون صحیح

اوله من شوقدر که کرم وجود الهی اولیای کرامک بعضی سنک بلکه ده جمله سنک

ارواح شریفه لرینه مدد رسان اوله رق روحانیتلر نی وسیله استعطاف اتخاذ

ایدنلره مبذولیت نمادر چونکه **انحن اولیاءکم فی الحیاة الدنیا و فی الآخرة**

بیورمشدر ایشته حد بودر ایلر وسنه تجاوز اولنه من مبالغات اعجامه فریفته

اراملیدر پیغمبر ذیشان علیه صلوات الرحمن افندمزک بیان بیوردقلری

اطرا بونلرک بعضیلری حقندهدر.

مخلوق زنده و مردنه اولورایسه قولدر صاقینکز فاعلدر اعتقاد اولنسون.

لا یملکون لانفسهم ضراً ولا نفعاً

تفسلرینه بیله ایصال خیر و شر اقتدارینه مالک اوله مز لر. اوت احبای

ندایه محبت وسیله استعطافدر حق تعالی حضر تلرینک بعض قوللرینه اولان

لهیه سی بر سر در که صفت حقدر بو صفت جلیله نعم الوسیلهدر.

مشاهده حضور در علم یقین ایله مقرون قرب در احسان حق ایله قول ازاده
غفلت اولور ایله علم یقین و حق یقین اوزره عبادت ایدوب تقرب ایدر که

ان تعبد الله کانک تراہ

دیمکدر. یوقسه موضوع اولان معنای لغوی اوزره مشاهده برکسه
ایچون صحیح اوله مز قصه حضرت موسی بوبابده برهان کافیدر مظهر قاب
قوسین افندمز حضرت لری واقعا بالقاب والعین مظهر مشاهده اولمشدر.
بونده اختصاص حضرت رسالت پناهیلری عندالاولیا مجزایم
ومسئله ده کی اختلاف کیفیتی معلومدر.

بورایه قدر ترجمه ایدیلان اثار وکفتار هب بالبداهه جانب امام
رفاعیدن مواقع معلومه ده اعظ و نصیحت یولنده ایرادیور لمشدر بعض
حضار طرفندن مهمامکن ضبط و تحریر اولنش اولماسیله صحائف مؤلفاته
بوصورتله درج و تزییر اولنشدر.

والحمد لله اولاً و آخراً والصلوة والسلام الاکملان الاکملان علی
اکمل خلقه و علی اله و صحبه و ائمة الدین اجمعین

مناسب مقام کلام اولدینغندن برقاچ بیت بورایه یازلمشدر

حکم سنجان میزان شریعتدر رفاعیلر	حقیقت باب معنای هدایتدر رفاعیلر
محب آل بیت حضرت مختاردر بونلر	تجلی زار انوار محبتدر رفاعیلر
مودت حکمی اجرا ایدوب شوق محبتله	سرایا عشق و سودادن عبارتدر رفاعیلر
سودادن بی خبردر کورماشدر فرق اغیار	حقیقت بین جمع بزم وحدتدر رفاعیلر
نوی عشق ایله هب بلبل آتش صیغر اما	کل نازکتر اوجاع خلقتدر رفاعیلر
کیروب برکه بزم شوقه کورسک بوابدالی	تعالی الله کیم برهان خیرتدر رفاعیلر
ایدرلر دلخرا بیض ایله کنجینه اسرار	طریقته رجال فیض و همتدر رفاعیلر

رموز غیبیه (قدری) آشنادر جمله سی آنجق

رجال شطح ایله بیگانه الفتدر رفاعیلر

تمت

Süleymanî Hacı İsmail
Hacı İsmail
798
Fıkra